



# **REPONS BIDZE 2024 GOUVERNMAN SESEL**

**Delivre par:**

**NAADIR HASSAN**

**MINISTER FINANS, PLANIFIKASYON NASYONAL EK KOMERS**

**Vandredi le 10 Novanm, 2023**

**4er Apremidi**

**Dan Lasanble Nasyonal Sesel**

**Ile Du Port, Victoria,**

**Mahe, Seychelles**

**Mersi Msye Spiker,  
Msye Spiker,  
Lider Lopoziyon,  
Lider Zafer Gouvernman  
Tou bann Manm Onorab e  
Tou dimoun a lekout  
Bonn Apremidi.**

**Msye Spiker,**

Les mwan konmans mon repons bidze par partaz en pti refleksyon ki mon fer ler mon'n leve bomaten e pe desann pou vinn travay. Msye Spiker, mon'n leve granmaten apre ki lapli ti pe tonm enpe, soley in leve e i montre ki sa Vandredi le 10 Novanm pour en zoli zour, akoz en soley briyan in leve lo Sesel. An desandan, zanfan avek en sourir lo zot figir pe desann pou al lekol. Seselwa pe desann pou al travay pou al debourye pou ganny zot lavi. En lanvironnman fantastik ki fer lizye ek leker kontan. Msye Spiker nou tou nou bezwen realize ki degre sanse nou ete pou viv dan en pei beni par bondye limenm.

Alors mon refleksyon, apre 2 zour negativite total sorti kot parti US mon demann mon lekor en kestyon? Be ki probrenm sa Parti US? Zot in penn en portre konmsi Sesel sa dernyen pei pou viv ladan ozordi! Konmsi Sesel sa pei pli pov dan lemonn! Pei pli dan mal ki egziste dan lemonn!

Me mwan koman en patriot, mon fyer mon pei e tou le zour mon annan gratid pour sa zoli pei ki bondye in donn nou, kanmenm tou son defi. Sa bann fo profet ki fer Seselwa kwar ki soley ti pou aret leve e kouse an Oktob 2020, ki lapli ti pou aret tonbe e ki tou keksoz ti pou fini Sesel, les mwan dir zot **SESEL I ANKOR LA, SOLEY ANKOR PE LEVE E KOUSE E NOU PEI PE KONTINYEN PROGRESE!**

Msye Spiker pour Seselwa konpran byen Mantalite SPPF/LEPEP/US se komanter Hon Aglae ki reflekte sa!

Kot in Dir tou keksoz Sesel se akoz US, konmsi legzistans Sesel se gras a zot!

Les mwan dan tou limilite dir avek Hon Aglae. Sesel in kree par bondye. Sikse Sesel i baze lo zefor e lasyer pep Seselwa. E Seselwa pa dwa US naryen. Pli gran legzanp sa kalite mantalite, i sa ki zot in fer avek Hon Naddy Zialor, yer

apremidi. Zot in akiz li koman ‘engra’, akoz dapre zot i dwa zot gratitud ziska son dernyen zour!. Se zot sa parti minoriter ki dwa Sesel ek Seselwa par zot aksyon lepase.

Msye Spiker les mwan dir zot Sesel ti egziste avan zot, Sesel i egziste san zot e Sesel pou kontinyen egziste san zot. Aret donn zot lekor lenportans akoz Sesel i pli gran ki zot. Arete sa mantalite parey bann FO PROFET.

Msye Spiker, mon oule konmans mon larepons lo bidze par premyerman remersi tou bann manm pou zot repons lo bidze. Mon anvi dir en gran mersi spesyal pour repons bann manm LDS, pou zot bann mo sipor, zot lakouranzman pour mwan ek mon lekip ki’n prepar sa bidze e osi pou pran letan e eksplik lepep kwa ki annan dan sa bidze. Mersi bokou!

Lo lot kote Msye Spiker, i ankor en dezapwentman avek parti minoriter. Zot in parey labitud koz bokou me pa dir gran keksoz. Zot in plizoumwenn pran zot letan maltret Prezidan, maltret bann minis e fer Seselwa kwar lizour pour aswar. Fer en bann gran gran promes, senm konfizyon e kontinyen obsede avek pouvwar.

Msye Spiker, mon ti’n mazine ki apre 3 an apre sa defet ekrazan e imilyan, ki zot douler ti’n ava redwir e zot ti’n ava kapab reflexir akoz ki zot ti ganny met deor, e vin avek en nouvo lide. Me non, parey toultan monn dir zot, 15 lo 10 zot pan reflexir akoz zot ti ganny defet. 2020 ankor zot pann reflexir vre rezon zot defet. E 2025, ler zot kwar zot pe lager pouvwar, sepa si zot pou ankor parti lopoziyon prensipal. Akoz zot senpleman pe vin irelevan akoz zot le tourn an aryer.

I paret mwan sa realizasyon ki manyer zot pe vin irelevan, i fer zot ankoler, annan lanmertim, vin anmer e vilger e ki sa douler defet ankor lour lo zot leker.

Mon a swete ki bondye a donn zot kouraz pou aksepte zot defet e bouze e vin en lopoziyon serye. A la fen di zour Sesel i bezwen tou son zanfan, menm bann ki konmela pe travay kont li. Msye Spiker, mon anann lespwar ki zot kapab sanze.

Msye Spiker, 3 zour monn ekout bann repons. Mon kwar ki i enportan dan mon repons ki mon fer kler ek pep Seselwa, ki Sesel i anann de swa kler devan zot. E sa bidze e larepons monn tande i fer sa vremen kler.

I anann en gouvrenman e parti LDS ki determinen pou anmenn Sesel devan e lot parti US, parti minoriter ki li i le retourn dan lepase. Sa i en swa vremen senp. E la mwan, mon oule demann lepep Seselwa enn de kestyon? Mon Mazine ki se sa bann menm kesyton ki zot ti reponn an 2020 e pou reponn ankor an 2025.

- I. Eski zot oule retourn ver en sistenm ranpli ek koripsyon?
- II. Eski zot oule retourn dan en sistenm viktimizyasyon e 'ek nou pa ek nou?
- III. Eski zot oule retourn dan en sistenm iresponsab ki'n fait sa pei, pa en fwa me 2 fwa?
- IV. Eski zot oule retourn dan en sistenm ki'n fer nou bann lakonpanyen, parey Air Seychelles, fait?
- V. Eski zot oule retourn dan en sistenm ki oule met nou sistenm Fon Pansyon an danze?
- VI. Eski zot oule retourn dan en sistenm ki donn zis ki sa ki US ek zot bann dalon you keksoz
- VII. Eski zot oule retourn dan en sistenm kot sa parti politik i fer biznes avek gouvernman?

Ser, frer Seselwa eski zot le retourn anba sa gro nyaz nwanr?

### **MON KWAR PA!**

Msiye Spiker, lo lot kote nou annan en gouvernman ki oule travay pou byennet pep Seselwa. Ki kantmenm desizyon i difisil i pa per pou pran desizyon. Enn ki annan en vizyon pour Sesel. E sa vizyon i vreman tre kler!

E la nou war sa gran diferans ant sa de parti!

Alors, les mwan eksplik dan en fason tre senp, ki vizyon sa Gouvernman e demontre mannyer lo kote sa parti minoriter zot vizyon i senpleman en ilizyon.

Nou konn laspirasyon nou pep.

- i. En lekonomi ki performan ki pou labaz kreasyon larises nou pei e nou sitwayen
- ii. Zot oule en servis piblik ki delivre pour zot
- iii. Lenfrastiktir ki meyer se aköz sa ki anmenn en devlopman ekonomik sosyal pour nou sitwayen e
- iv. En pei ki anann lord ek lape, e lager kont sa bann fleo sosyal

Msye Spiker, sa se bann priorite pour sa gouvènmman. Me lo lot kote ler mon'n ekout bann diskour parti minoriter. Mon demande.

Oli zot plan?

Oli sa alternativ?

Ki manyer zot pou finans sa plan alternativ?

Sel keksoz ki dan zot plan ki mon'n tande se

- i. bann polisi popilis e bon marse
- ii. Maltret Prezidan
- iii. Maltret Minis
- iv. Bat kalot dan tou keksoz
- v. Gele e plennyen aköz zot nepli o pouvwar
- vi. Kontinyen reve pou ganny pouvwar e
- vii. Sel keksoz ki zot obsede avek se pouvwar

Ki pouvwar in fer zot, ki 43an pann ase, ki zot, ankor dezespere pou reganny pouvwar?

Msye Spiker, eski ler zot fer bann deklarasyon eski zot mazine avan zot koze?

Les mwan met sa dan en lot fason pli senp pour Seselwa.

En papa i vinn kot lakour e i dir ek son fanmiy. Ozordi mwan ek manman nou pou komans travay mwens e anmenn mwens larzan kot lakour. Me anmenmtan nou pou al fer pli gro lakaz e aste pli gro loto. Sa ilustrasyon senp, Msye Spiker i senpleman sa realite ki parti US pe met devan lepep Seselwa.

Annou regard zot pozisyon lo fon pasyon. Tou bann eksper teknik fon Pasyon, Minister Finans ek bann eksper enternasyonal in dir ki an 2034, fon pasyon pou fait san reform. Avek sa konteks zot pe dir tir plis larzan ladan e met mwens larzan ladan.

Msye Spiker, si zot vreman kwar sa ki zot dir, mon 'challenge' zot, pou vinn avek bann analiz e kalkilasyon ki manyer zot plan pour fon pasyon i ete.

Les mwan dir zot 'Walk the Talk'. Pa zis fer bann gran gran deklarasyon.

Kekfwa vre mon mal, kekfwa vre bann teknisyen ki donn mwan konsey i mal. Kekfwa vre tou sa bann eksper enternasyonal i mal.

Kekfwa, se sa parti minoriter ki'n fer vini en eksper 4000 dollar pou aranz Fon Pansyon e ki annan bann ansyen ansennyan matematik ki kwar 25 milyon Ero i R300,000 pour konsey zot, kekfwa zot ki BYEN.

Me mon a donn zot 'benefit of the doubt' akoz kekfwa zot a rezourd en problemm mondyal kot laz pe monte e en kantite fon pansyon atraver lemond pe rankontre problem i bokou. San dout zot a bezwen ganny en pri nobel pour 'economics' ek finans. Akoz pa bliye, zot, zot annan bann ekomis ki train lo You yube.

Msye Spiker, kestyon enportan se oli polisi parti minoriter? Mon pa war.

Oli polisi ekonomik parti minoriter? Mon pa war.

Oli zot plan pou rekonstrir nou pei? Mon pa war.

Sa parti minoriter pann donn okenn plan konkret? Akoz?

Eski larepons se ki zot napa en plan.

Zot in zis montre ki sa ki enn zot ansyen Minis ti dir, ki zot 'intellectually Spent', sa i vreman en tre bon deskripsyon pour zot.

Ozordi, i kler Msye Spiker, ki sa parti minoriter la anndan, napa en sou plan pour sa pei e sa pep.

Msye Spiker, sa parti minoriter i annan en listwar e 'legacy failure'. E la, ki nou vwar, zot pe vin avek bann menm solisyon lepase ki'n fel nou pei e nou pep, ki'n fer, parey monn dir avan, sa pei fait 2 fwa. Sa bann solisyon lepase ki'n fel nou, ler zot ti o pouwar, zot sertenman pa solisyon pour nou pei ozordi e pour nou pei bouz devan. Msye Spiker, nou pei pe bouz devan e avek sa bann devlopman ki pe arive, sa parti minoriter in nepli okenn 'opsyon pour Sesel.'

Msye Spiker, sa parti minoriter pe kontinyelman bat sa tanbour 'aret investir dan devlopman lenfrastruktir'. I fer 3an ki mon pe asiz la devan pou ekout zot repons, e toultan zot dir menm zafer menm. Kestyon? Si nou aret investir dan lenfrastruktir ki mannyer nou pei pou devlope, e ki mannyer nou lekonomi pou agrandi, pou kree plis larises pour Sesel?

Kote nou bann zenn pou al lantrenman pou fer sport si nou pa investir dan lenfrastruktir? Kote nou zanfan pou al lekol, si nou pa investir dan lenfrastruktir? Kote bann ki malad pou ale pou ganny swen medikal, si nou pa investir dan lenfrastruktir? Ki mannyer mouvman dimoun e komers pou ete, si nou pa investir dan lenfrastruktir? Ki mannyer touris pou kontinyen vin Sesel, si nou pa investir dan lenfrastruktir? Ki mannyer komodite pou antre dan sa pei, si nou pa

investir dan lenfrastruktir? Ki manner travayer pou oule al travay, si nou pa investir dan lenfrastruktir? Ki manner nou pou asiste bann ki pe rod lakaz avek gouvènmàn, si nou pa investir dan lenfrastruktir? Ki manner nou pou gard lord, ek lape ek sekirite dan nou kominote si nou pa investir dan lenfrastruktir?

Msye Spiker, mon ti a kontan envit bann manm US pou mars enpe aswar e regarde manner nou semen i eklere ozordi, lenstalasyon nouvo lalimyer. Sa i en lenvestisman dan lenfrastruktir. An 2023, ti annan R7 milyon pou aste e enstal nouvo lalimyer dan semen, e la an 2024 pou annan en lot R7.7 milyon. Bann semen pe ganny refer e resirfas. ‘At least’ la nou pa a kwar nou dan van swet 12 mwan dan en lannen, ler nou pe dray.

Msye Spiker, zis get kantite larzan ozordi ki nou pe bezwen depanse zis pou investir dan renovasyon batiman gouvènmàn dan sa pei, akòz move zestyon sa parti minoriter. Depi son lekòl, klinik, semen, fasilite sportiv, librerri Nasyonan. Tousala in ganny neglizè. Si US ti konn fer zot travay, zanmen nou ti pou bezwen sa ta larzan pou investir dan renovasyon lenfrastruktir. E sa Msye Spiker, i en laverite e enn zot pli gran ‘failure’ pour sa pep ek sa pei.

Msye Spiker, ozordi, sa kantite lenvestisman dan lenfrastruktir ki pe arive lo Praslin ek La Digue, i enorm. Sa lenvestisman i pa pou ni Prezidan, ni bann Minis e ni sa gouvènmàn ki la. I pour zabitan sa de zil. I pou ede dan zot lepanouisman personel e sertenman dan devlopman sa de zil.

Zis par egzanp, get kondisyon lekòl La Digue. Eski en nouvo lekòl pour sa zil i en lenvestisman pour Prezidan, pour Minis ek gouvènmàn? NON. I pour sa bann zanfàn Diguois annan en lanvironnman lekòl konvenad pour zot aprann pou vin bann sitwayen byen edike, entelizan e responsab.

Msye Spiker, mon ti personelman al vizit lekòl La Digue an 2022. Sa zil i annan en plas spesyal pour mwan, akòz mon Madanm i en Diguoise. Mon 2 zanfàn zot osi zot lanmwatye Diguiose. Kondisyon sa lekòl ti fer lapenn e deplorab. Mon ti envit Onorab Zil Pros pou vinn sa vizit, me i ti ‘nowhere to be found’. Selman, toudmenm sa vizit ti pas tre byen akòz Diguois zot tre akeyant.

Msye Spiker, mon mazine ler travay lo sa lekòl i konplete, Onorab pour la pour li vin koup riban. Mon swete.

Me la mwan donn li en warning! Pa vinn ek okenn petisyon pou pa fer lekòl La Digue, akòz sa petisyon pou pas parey sa enn ki ou ti fer pour lopital St Mary’s.

Msye Spiker, an 2024, nou pe met en kantite larzan pou investir dan bann fasilite sportif ki’n ganny neglizè pour plizyer lannen. Zot osi, zot dan menm kondisyon ki lekòl La Digue. Konmsi, si ou ekout sa parti minoriter, tou sa bann

fasilite in tonm dan sa bann move leta, pandan sa dernyen 3an. Mon'n fer li mon devwar ansanm avek Minis pour Sport, pou al vizit sa bann lenfrastriktir. Mon'n soke ki mannyer en gouvènmàn ki servi 'taxpayer's money' pou investir i kapab les lenfrastriktir pei tonm dan en tel degenn. Apre anmenn PNQ pou rode akòz performans atlet i pli ba. Be demann zot lekor sa kestyon. Zot devret kanmi.

Msye Spiker, sa zafer 'aret investir dan lenfrastriktir', i enn parmi deklarasyon sa parti minoriter ki pli bet ki monn deza tande. Lekel sa pei ki pa investir dan son lenfrastriktir? Menm en fanmiy, enn bann premye lenvestisman ki i fer se dan son lakaz, en lakaz i kwa Msye Spiker? En lenfrastriktir.

Msye Spiker, nou pa pou zanmen ekout sa parti minoriter an sa ki konsèrn lenvestisman dan lenfrastriktir, sirtou pour nou refer nou fasilite sportiv. Nou sertenman pa pou zanmen ekout en parti ki'n fel Sesel ek pep Seselwa.

Anplis, Msye Spiker, sa parti minoriter in montre ki mannyer zot konfize e kontwadwir kanmarad. En bann pe rod plis lenvestisman dan lenfrastriktir, parkont en lot bann pe plennyen, pe dir aret investir dan lenfrastriktir. Mon mazin en bann ki'n ganny elekte, zot konpran lenportans pou investir dan fasilite dan zot distrik. Parkont, sa 4 ki pann zanmen debout dan en eleksyon, zot, zot pe kriye 'pa investir dan lenfrastriktir'. Align zot. Aret senm konfizyon. Annan konsistan dan zot largiman. E mazin en avan ki zot koze.

Msye Spiker, ler mon tann sa parti minoriter pe demann plizyer Minis pou demisyonnen, mon bezwen riye. Ou konnen akòz Msye Spiker, akòz zot bliye ki se pa zot ki o pouwar. Les mwan fer tre kler avek sa bann Onorab lekel ki'n apwent sa bann Minis. Se pa lot ki Prezidan Ramkalawan ki an Oktob 2020 ti ganny en laviktwar ekrazan, 55% Msye Spiker. Sa bann Minis ti ganny konfirman dan zot pozisyon par sa mazorite LDS, e pa par sa bann MNA parti minoriter. Pour sa enn ki li pe kontinyelman kriy pli for 'resign minis', mon konsej li al debout dan en eleksyon, ganny elekte par lepep Seselwa, olye par zis 9 son prop manm. Msye Spiker, nou pran lord avek Prezidan, pa avek en MNA ki pa konnen ki mannyer pou debout dan en eleksyon.

Msye Spiker, lo sa size konpansasyon, kot sa parti minoriter pe koz labous plen ozordi, mon oule fer zot rapel ki set akòz zot lenkonpetans, zot bann aksyon korigasyon ki nou dan sa sitiasyon.

Anka zot in oubliye, les mwan fer zot mazin en;

- i. Polisyon delo La Misere – enn zot lenkonpetans ki ozordi taxpayer pe bezwen peye



- ii. Polisyon stasyon elektrisite PUC, Baie ste Anne – en lot zot lenkonpetans ki ozordi taxpayer pe bezwen peye
- iii. Konpansasyon pour Msye Allain Ste Ange apre ki zot gouvernman ti retir zot sipor pour son kandidatir pour pozisyon Sekreter Zeneral UNWTO – en lot zot lenkonpetans ki taxpayer pe bezwen peye
- iv. Zot bann atosite kont sa pep – ankor en lot aksyon malfeter ki ozordi zot pe refize zot rol ladan e ki zot oule taxpayer ki peye

Tousala, sa bann konpansasyon ki pez lour lo taxpayers, Msye Spiker. Me lekel ki responsab? Se sa parti minoriter ki ozordi, zot in lav zot lanmen, akoz zot pa responsab. Anefe ler ou ekout zot, zot pa responsab pour naryen ki'n al mal anba zot 'watch' dan sa pei. Zot kwar ler zot sanz zot non, i sanz sa ki zot ete, Sanz zot non mil fwa, zot pou reste sa ki zot ete.

Seselwa les mwan demann zot en kestyon. Konbyen letan zot koman taxpayers ki zot pou peye pour lenkonpetans sa parti minoriter?

Msye Spiker, bokou in ganny dir ki gouvernman pe donn later ek biznes bann dalon. Msye Spiker, mon ti a demann sa bann MNA pou si zot annan laprev, fer zot devwar koman sitwayen responsab e 'file' zot plent. Aret fer alegasyon e zis koz lalang. Zot bon lo la zot.

Ler zot pe zis balans alegasyon kont dimoun, les mwan demann sa MNA, konbyen bann ansyen MNA US ki'n ganny later endistriyel? Konbyen ki'n ganny later lo zil Eve? Pa bliy serten bann ansyen Minis osi, ki'n donn bal dan later gouvernman e ler zot sorti Minis, zot annan biznes.

Dirizan sa parti minoriter, eksplik nou en kou sa fiasko Ile Soleil. Larzan Seselwa ganny servi pou fer reklamasyon later, apre zis en endividi ganny preski tou later. Sa ki pli pir, Msye Spiker, ou konnen kwa, pa konnen ki kalite manboulouk ki zot in fer, la sa menm endividi ki annan preski tou later lo sa zil, gouvernman ek taxpayers i dwa li. Be sa ki kalite?

Msye Spiker, mon'n ekout byen analiz fiskal enn sa bann Onorab parti minoriter. Mon anvi dir li ki sa ki'n ekrir son diskour e analiz in fel li, akoz sa analiz i byen mal.

En legzanp, nou'n in sey eksplike ki mannyer ou get diferans koleksyon parmi sak lannen dan taks. Non Onorab pa koumsa ki kalkile. Pour ou konpar taks Ou get ou 'tax to GDP ratio', si i pe monte, si i pe desann.

Onorab, mon konsey, dir sa ki'n ekrir ou analiz fiskal i ankor annan 'training' pour li fer. Dan lavenir rod enn ki pli bon.

Msye Spiker, ki kalite analiz ki sa parti minoriter i vin avek ler zot dir ki ‘kou lenflasyon i ba aköz Seselwa pa pe depanse aköz pri i ba’. Eski en dimoun i kapab eksplik sa kalite analiz avek mwan silvouple, aköz mon kwar, nou tou, nou konfize. En konfizyon total.

Msye Spiker, lider lopoziyon i dir gouvènmman pe dir i pe fer byen, me selman in fek pran R75 milyon an Bond. Dapre son lozik, si mon konpran, sa i vedir ki gouvènmman pe fait. I bezwen pret larzan.

Msye Spiker, mon pa konnen ki manner mon pou dekrir sa kalite analiz, e mwan, mon annan 20an koman en ekonomis. Premye fwa mon tann sa.

Msye Spiker, dan tou pei dan lemonn, zot ‘issue’ det. Sesel in touzour ‘issue’ det, e pou touzour ‘issue’ det, pe enport parti politik ki o pouvwar pou ‘issue’ det. Napa okenn gouvènmman ki pou fonksyonn san pran det. Les mwan fer kler ek Onorab Lider Lopoziyon ‘ou pa pou montre mwan ek mon lekip ki manner mon pou fer nou louvraz.’

Msye Spiker, parti minoriter in koz lo ‘under execution of capital project’, konmsi sa se en lenvansyon gouvènmman LDS. Sa I en keksoz ki pandan sa dernyen 3an ki’n arive.

Les mwan sit zot prop minis finans ki i ti dir dan son diskour bidze an 2019. La mon site.

*“Lo zesyon nou bann proze kapital, msye Spiker, nou rekonnet sa ‘challenge’ ki nou pe eksperyanse pandan sa dernyen 10an. An 2013, nou ti entrodwir nou polisi lo zesyon proze kapital dan sekter piblik, avek lebi amelyor lafason ki proze i ganny konsepte, swazir, analize e ganny selekte. Lapwentman en ‘Development Committee’ in ede pou asire bann proze kapital ki ganny konsepte par bann minister oubyen departman i aktyelman nesese e ki napa anbigite dan seleksyon proze. Me parkont, defi ki nou ankor pe vwar se dan egzekisyon proze. Depi 2015, Msye Spiker, egzekisyon proze i ganny ‘monitor’ e reporte avek Cabinet of Ministers’ tou le trwa mwan, Me parkont, nou rekonnet ki nou annan bann defi enstitisyonel e kapasite pou asire ki nou kapab egzekite tou bann proze dan bidze.’*

Sa statement ti ganny fer par Minis Finans an 2019. Si mon rapel byen, pa mwan ki ti Minis Finans an 2019. Se zot Minis ki ti dir sa. La en sel kou sa problemn ‘under-execution of capital project’, in kree par gouvènmman LDS.

Zis pou fer rapel osi Msye Spiker, an sa ki konsern lenportans proze kapital. An 2019, zot proze ‘landmark’ ti en tinnel ant Grand Anse Mahe e Cascade. Par

kont nou Ladministrasyon, nou proze ‘landmark’, i en nouvo lopital pour sa pei e sa pep. Msye Spiker lala diferans ant sa de parti.

Msye Spiker, Lider Lopozisyon i dir zot in met plis larzan dan pos Seselwa konpare avek nou gouvernman.

La en pti fe. I fasil pour ou zis al fer en pti resers, ou a war pour ou menm.

Bidze 2019, bidze saler gouvernman, ki gouvernman US ti anmennen, ti R2.676 bilyon. Ou konnen konbyen bidze saler gouvernman an 2024 – R3.66 bilyon – en bilyon rounpi an plis. Se nou gouvernman kin met plis larzan dan pos Seselwa – en bilyon rounpi anplis.

Msye Spiker, sa menm Lider Lopozisyon, parey monn dir in fer plizyer alegasyon lo depans gouvernman. Me pa i annan en prosedir tre kler ki Lasanble i fer lenvestigasyon depans gouvernman. Pa FPAC ki fer sa? Lekel chairman FPAC? **MWAN?**

Msye Spiker, mon a konsey chairman FPAC pou fer son louvraz ki taxpayers Seselwa i pey li pou fer, olye zis pas son letan zis fer alegasyon. Mon a osi konsey li pou pa bliy sa rapor Oditer Zeneral lo tranzaksyon later son parti avek son prop gouvernman sa lepok. Sa pa alegasyon, me i fe e lenformasyon kredib.

Msye Spiker, ler nou pe koz lo zis fer alegasyon e koz lalang avek sa pep, mon bezwen dir mon vremen dezapwente avek Onorab Le Miel, MNA mon distrik.

Onorab, i vin la dan sa Lasanble, devan pep Seselwa e dir ki nou gouvernman an 2021 ti tir ‘scheme’ pour finans lakaz dimoun vilnerab e dimoun aze. Be announ get bidze 2021, 2022, 2023 e 2024

- i. An 2021 - Home Improvement/re-roofing scheme pour pansyoner – R5 milyon e Poverty Alleviation Home Repair R9.1 milyon.
- ii. An 2022 - Home Improvement/re-roofing scheme pour pansyoner – R5 milyon e Poverty Alleviation Home Repair R4.65 milyon
- iii. An 2023 – Home Improvement/re-roofing scheme pour pansyoner – R5 milyon e Poverty Alleviation Home Repair R20 milyon e
- iv. An 2024– Home Improvement/re-roofing scheme pour pansyoner - R5 milyon e Poverty Alleviation Home Repair R10 milyon.

Msye Spiker, anplis, mon oule fer Seselwa konnen ki dan sa bidze i annan en keksoz pour zot tou. Par egzanzp;

- i. Dan sekter Lasante, nou pe envestir R1.41 bilyon

- ii. Dan sektor Ledikasyon, nou pe investir R1.40 bilyon
- iii. En sonm R41.1 milyon pe ganny investir dan program 'breakfast' ek dezennen – pa bliye avan gouvènmman LDS ti napa program 'breakfast'
- iv. Zafan P5 ek P6 pou kapab aprezan benefisye anba Laptop Scheme ki annan en bidze R 5 milyon
- v. En sonm R 27.6 milyon in ganny bidzete pour 'Day Care Scheme' e dan 'ECCE Trust Fund' i annan en sonm R 1.6 milyon
- vi. En sonm R 198 milyon pou anvoy nou zenn letid liniversite
- vii. En sonm SR 21.4 milyon pou pey 'stipend' bann etidyan sant profesyonnel
- viii. Bann etidyan sorti lo Zil Pros ki vin lekòl Mahe, pe ganny en ogmantasyon R600 lo zot stipend
- ix. Zafan lo Zil Pros ki kalifye pour A Level, pou kapab al lekòl Vijay International lo Praslin
- x. En sonm R 10 milyon pe ganny mete pour bann proze lakaz anba skim spesyal.
- xi. En sonm R 18 milyon anba skim finansman lakaz avek bann labank.
- xii. En sonm R12 milyon pour scheme part rental
- xiii. En sonm R 3.4 milyon pour devlopman sport lo en baz profesyonnel
- xiv. Revizyon dan 7 Benefis 'Statutory' e nou'n menm al pli lwen par azout en 8tyenm benefis
- xv. Sa program Tanporer kot gouvènmman i 'top up' Pansyon e benefis dezabilite ek envalidite, ziska en maximum R500 pe kontinyen
- xvi. En sonm R10 milyon pour travay lo bann semen segonder dan distrik, ki enkli sistenm drenaz osi
- xvii. En sonm SR 7.7 milyon pou enstal lalimyer lo semen e

Msye Spiker, ler mon tann dir napa naryen dan sa bidze, mon pa konpran sa konmanter.

Msye Spiker, sa parti minoriter i koz lo sa ki annan plis pe kontinyen annan plis e sa ki pli napa pou kontinyen napa, e sa i lakizasyon ki zot pe fer kont sa gouvènmman LDS. Me, Msye Spiker ki bann sif i montre nou. Pran rapor en Gini Inequality Index ki pran 'data' ant 2013 – 2018. An 2013 a 2018, se parti US ki ti o pouvwar. Ki sa co-efficient i montre? Sa co-efficient i montre lekar ant sa ki annan ek sa ki napa. Dan 76 pei, Sesel i 10zyenm ki annan pli gran 'income inequality' dan lemond. Felisitasyon gouvènmman sppf/lepep/US, pandan zot manda, zot in fer Sesel 10zyenm lo lalis pei dan lemond kot i annan pli gran dekalaz ant sa ki annan ek sa ki napa.

Sanmenm sa reisit en parti sosyalis, ki dapre zot pe get tou dimoun, pe met zonn o sant zot devlopman? Sel keksoz ki mon kapab dir zot, se arete koz

mansonz, levidans zot lepase ranpli avek 'failure' i la pour tou dimoun war. Parey, monn dir zot pli boner, Sesel ek lepep Seselwa napa plas e sertenman pa bezwen sa parti minoriter avek son bann solisyon lepase ki'n fel nou.

### **Konklizyon**

Msye Spiker, an konklizyon, mon oule dir mersi tou dimoun ki pe vreman war merit e vizyon sa bidze e tou sa bann bidze ki sa gouvèrnman in prezante depi 2021.

Nou pe travay pou etabli en fondasyon for e rezilyan pour nou lekonomi. En lekonomi rezilyan I kapab fer fas bann sok eksteryer, Msye Spiker. Depi 2020, nou'n dir klerman ki sak bidze ki sa gouvèrnman i prezante i bezwen met fondasyon pou diversifye e transform nou lekonomi. Nou napa lot swa Msye Spiker. Pandemik Covid 19, lager ant Ikrenn ek Larisi in montre nou klerman ki sa depandans lo lendistri tourizm nepli soutenab. Gouvèrnman pou kontinyen investir dan lenfrastriktir pou permet sa diversifikasyon ek transformasyon arive. Nou pe ankouraz tou Seselwa pou pran tou sa bann loportinite ki nou pe donn zot pour zot prop lepanouisman personel. Ler ou leve ou debourye, ou pa bezwen depan lo okenn dimoun, sirtou bann politisyen FO PROFET, parey sa US.

Msye Spiker, Bidze 2024 pe asir saler tou travayer sekter prive. Sa bidze pe asir benefis retret tou pansyoner, benefis pour tou bann dimoun avek dezabilite ek envalidite. Sa bidze pe asir benefis sosyal pour tou bann ki bezwen. Sa bidze pe asir ledikasyon pour tou nou zenn. Sa bidze pe asir lasante pour tou Seselwa. Sa bidze pe asir lenvestisman dan lenfrastriktir pei e son pep.

Msye Spiker, mon oule remerci Prezidan Ramkalawan, Vis Prezidan, mon bann koleg Minis e zot lekip teknisyen pour zot sipor dan preparasyon sa bidze.

Ankor enn fwa, mon remerciye tou travayer dan mon Minister e bann lazans ki tonm anba mon portfolio pour zot profesyonalizm, e zot devouman dan zot travay.

Bann manm Lasanble ki'n osi konpran vizyon sa bidze, mon dir zot mersi pour zot sipor e langazman.

**Mersi Msye Spiker.**

